




6140



827


12



18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43







來齋金石刻考畧目錄 卷中

唐 一百二種

御書 十四

高祖草堂寺爲男世民祈疾疏 大業二年正月

秦王告少林寺主教 武德四年

太宗書屏風銘 貞觀十四年四月

太宗晉祠之銘 貞觀二十一年七月

高宗萬年宮銘 永徽五年五月

高宗書英貞武公李勣神道碑 儀鳳二年

睿宗周順陵碑 長安二年正月

景龍觀鐘銘 景雲二年

元宗紀太山銘 開元十四年

元宗注孝經 天寶四載

元宗孝經石臺批答 同上

鵲鶴頌 開元年

金仙長公主碑 開元中

代宗會善寺戒壇批答 大曆二年

昭陵及陪葬 十六

太宗文皇帝哀冊 貞觀二十二年褚遂良書

虞國恭公溫彥博碑 貞觀十一年歐陽詢書

尚書右僕射申公高士廉瑩兆記 貞觀二十一年趙模正書

梁國文昭公房元齡碑 貞觀二十二年褚遂良書。縉案以上二碑据文俱當在高宗初

中書令高唐公馬周碑 永徽二年殷仲容分書

國子祭酒憲公孔穎達碑 貞觀二十二年于志寧撰

芮國公豆盧寬碑 永徽元年

太常卿汾陰獻公薛收碑 永徽六年

司徒衛國景武公李靖碑 顯慶三年王知敬書

禮部尚書張允碑 顯慶三年三月

蘭陵長公主碑 顯慶四年碑殘缺無書名。縉案寶刻類編云駙馬都尉寶懷哲書

太子少師崔敦禮碑 顯慶年碑殘缺無書名

陽翟侯褚亮碑 碑殘缺無年月撰書姓名貞觀二十二年薨

大將軍許洛仁碑 龍朔二年十一月

大將軍阿史那忠碑 殘缺無年月撰書姓名。縉案集古錄上元二年金石錄咸亨二年

右武衛將軍乙速孤行儼碑 白義暉分書開元十三年

昭陵陪葬百六十人現存碑十六通英公李勣碑

為高宗御書錄於前 淳化閣帖有汝南公主墓

誌虞世南書攷昭陵圖汝南亦葬陪陵此墓誌不

知即塚中之石出諸人間或永興公別書以傳世

也再按唐書太宗二十一女其陪陵者常山新城

以下十六主碑存者惟蘭陵墓誌傳者獨汝南其

餘則散為風煙淪為土壤矣合裝一冊於昭陵石

跡庶幾無遺

闕里孔子廟內 六

孔廟詔表碑 武德九年乾封元年。縉案此即贈秦師孔宣公碑之陰當移下

孝女曹娥碑

蘭亭敘 永和九年

周孝侯墓碑 縉案此碑宜繫唐元和六年

筆陣圖

保母磚 興寧三年

洛神賦

于山二斷碑 太和七年

梁

瘞鶴銘 天監十三年 華陽真逸書

後魏 三

魯郡太守張猛龍碑 正光三年

以下頁為卷目錄詳訂

中嶽高陽寺碑銘 天平二年四月

李仲璇修孔廟碑 興和三年

北齊

修孔子廟碑 乾明元年

後周

華嶽頌碑 天和二年 趙文淵隸書

車騎大將軍豆盧恩碑 保定二年 庾信撰文

隋

龍藏寺碑 開皇六年 張公禮撰

安喜公李使君碑 開皇十七年三月

隋都督榮澤令常府君墓志 大業三年八月


陳明府修孔廟碑 大業七年七月

智永千字文

李靖上西嶽書

皇甫府君碑 歐陽詢正書 貞觀

文州總管陸使君碑 貞觀十八年 郭儼書



來齋金石錄考畧中

侯官林 侗于野纂輯 馮 縉笏軒甫校刊



唐

御書十四

高祖為太宗祈疾疏

此隋大業二年正月八日刻也高祖此時尚為鄭州刺史太宗方九歲疏云鄭州刺史李淵為男世民目患先於此寺求仙蒙仙恩力其患得捐敬造石碑像一鋪願此功德資益弟子男及合家大小福德具足永無灾障弟子李淵一心供養石方廣尺許在鄆縣草堂寺非原石乃元寺僧重刻未佳



秦王告少林寺教 行書

今在少林寺中其文刻于裴灌少林碑之上方首曰太尉尚書令陝東道益州道行臺雍州牧左右武侯大將軍使持節涼州總管上柱國秦王世民告柏谷塢少林寺上座寺主以下徒衆及軍民首領士庶等末曰四月三十日按舊唐書太宗紀高祖受禪拜尚書令右武侯大將軍進封秦王加授雍州牧武德元年冬拜太尉陝東道行臺尚書令尋加左武侯大將軍涼州總管三年加拜益州道行臺尚書令七月總率諸軍攻王世充於東都則此乃四年之四月三十日也其五月丙寅則世充降而河南平矣世民二字草書特大乃太宗親書餘

字乃記室叅軍所爲今少林寺僧以棒法擅天下在隋之世已能助秦王抗王世充其來舊矣闖獻之亂獨不敢侵犯少林而僧衆專以標掠諸賊爲事僧徒往往有列大帥建牙者

太宗晉祠之銘

太宗御製并書 貞觀二十一年七月建

顧寧人金石文字記祠在太原府西南四十里距今太原縣八里而今縣則古晉陽之故址唐時爲并州爲北都爲河東節度使治昔人立廟於此以祀唐叔考之北齊書已有其名而唐高祖起兵嘗禱於此冊府元龜太宗貞觀二十年正月幸晉祠樹碑製文親書之於石今存祠中蓋昔之并都甚大祠去城三四里在懸窰山之麓

晉水之所發源後人於此引池結亭架橋其上林木翳然足為一方之勝其廟負山而東面者晉水之神南面者唐叔之神後晉天福六年封唐叔為安王臺駘為昌寧公而宋時又封晉水為顯靈昭濟聖母飾為婦人之像今之人但言聖母而不復知有唐叔為古先有土之君矣水經注云昔智伯遏晉水以灌晉陽後人踵其遺跡蓄以為沼沼西際山枕水有唐叔虞祠水側有涼堂結飛梁於水上北史薛孝通曾與諸人同詣晉祠皆屈膝盡禮孝通獨捧手不拜顧而言曰此乃諸侯之國去吾何遠恭而無禮將為神笑是則當時之所祀者唐叔非水神也祠前蓮花臺上有鐵人四一紹聖四年一五年

造俱完一宏治十一年一無年月俱壞今之工不及古也

碑陰

右碑陰上方扈從諸臣題名者七人司徒太子太師上柱國趙國公臣無忌 太子太保上柱國宋國公臣瑀 特進太子詹事兼左衛率上柱國英國公臣勣 光祿大夫刑部尚書上柱國鄖國公臣張亮 禮部尚書上柱國江夏郡王臣道宗 太常卿駙馬都尉柱國安德郡公臣楊師道 正議大夫守中書令太子左庶子兼攝吏部尚書護軍臣馬周 凡七行字體不一皆當日七公自書者觀高宗萬年宮碑陰同一例也下方空

處皆唐以後人漫題絕無唐人書以本朝御碑臣子不敢擅題也余此碑得之舊書肆而缺碑陰祥符周雪客許補贈碑陰及余至江寧而周適粵余歸而周死矣天末片紙難以復得命家弟與人錄此七行於冊末按唐書新羅王金真德遣其子弟入朝其歸也太宗令公卿宴餞賜以御製溫湯晉祠銘二碑本想新羅至今猶寶藏也而溫湯之石今亦亡矣

唐太宗御書屏風銘

貞觀十四年四月二十二日

在餘杭縣官廨 丙午春予在燕京報國寺集場見唐太宗屏風銘帖索重價不能得庚戌初夏與友人陳成之士芳夜坐齋中論太宗以神武定天下而六書八法

精妙乃爾非天縱安能若此因憶屏風帖殊覺悵然成之謂鄉學究巾笥中有此紙不知貴重因以免園冊易之對坐補綴手自裝潢迄今不覺三十年里人有爲餘杭令者知此石在解中因首行石缺名爲截角碑連得兩紙歐陽公云物常聚於所好非耶若太宗所書文德皇后碑魏鄭公碑與溫泉宮碑皆亡久矣則此帖其可不貴重乎

高宗萬年宮銘

永徽五年五月建行書

高宗御製御書石高四尺廣二尺二寸許光二行每行四十一字碑今在麟遊縣九成宮山中萬年卽九成之更名也高宗書法不愧乃父大約皆精入於羲獻而閭

劣受制武氏可哀也

萬年宮碑陰題名

碑陰刻奉勅中書門下見從文武三品以上并學士并聽自書官名於碑陰後列從官長孫無忌李勣褚遂良等五十餘人字體大小不倫如賀蘭契苾諸番將當非親書如大將軍張貴生硬之中却有拔劍橫矛之意亦一奇觀

司空英貞武公李勣碑

在醴泉縣昭陵 高宗御製御書 儀鳳二年十月

漢之興也項羽爲之先驅唐之興也李密實首發難羽咤叱生風微司馬子長之筆則拔山蓋世亦無由而傳密非羽比然亦一世之雄信布楚將卒爲漢臣英公鄭

公始事密而終爲唐之良佐信有天焉未可以成敗論也世勣統數十州之地歸唐而不居其功密以叛誅而表請收葬不負事人之節可謂難矣碑中所謂密來投附公獨未歸旣承其旨方奉皇運誠於所事造次必形者是也勣與鄭公皆爲唐佐命臣勣幸而豐碑存後人因以識其塚屹若連山之狀鄭公不幸豐碑一仆於文皇再墜於後之監子後人不知但稱爲丞相塚云余入潼關渡涇渭謁昭陵徘徊陪葬諸功臣丘隴間碑碣百存其二三鄭公碑已爲泰山之無字且卧於地英公碑製巍然而磨滅者過半不勝懷古之悲及至澶淵固古來戰爭之場英雄之所馳驅也壁壘猶存西眺鉅鹿想

天地之震動咫尺黎陽憶敖庾之貯積過大伾繙濬縣誌讀之而得鄭公所為密墓誌銘深嘆其不終澶州夜雪鈴柝聲寒展羽本紀一再讀之風耶雨耶車馬劍戟之聲耶草昧英雄成就如此不知其欲歌而欲泣也陪陵碑此最高大豈非以陛下家事一言而為是以報之耶乃敬業之叛武后既發塚而暴其屍此碑獨不毀何歟塚為陰山烏德韃山之狀土人謂下三塚李衛公墓居北謂上三塚相去碑高二丈餘廣五尺三十二行每行存上半四五里許十字可觀餘字為鄉人捶損過半矣以摹印之累也密墓在濬縣大伾山西南五里高七仞明初牧人入塚取石而出明末為鄉人燔作石灰可惜守土與士大夫均

有責也丙午秋日跋於澶淵披雲樓并錄密墓誌備考焉

唐故上柱國光祿卿邢國公李公墓誌銘

太子洗馬魏徵撰

觀夫天造草昧之初有聖經綸之始原鹿逐而猶走瞻鳥飛而未定必有異人同出命世挺生負問鼎之雄圖鬱拔山之壯氣控御英傑鞭撻區宇志逸風颺勢傾海岳或一丸請封函谷或八千以割鴻溝夏殷資以興亡楚漢由其輕重懋功隳乎將立奇策敗於垂成仰龍門以摧鱗望天池而墜翼求之前載豈代有其人者哉公諱密字元邃隴西成紀人自種德降趾宏道垂風導碧海之長瀾竦閩峯之遙構家傳餘慶明哲繼軌論文德

則弼諧舜禹語武功則經綸秦漢其餘令望且公且侯  
垂翠綵拖鳴玉者蓋亦耆舊未得盡傳良史莫能詳載  
矣曾祖弼周太師上柱國衛公祖曜周太保魏公父寬  
隋上柱國大將軍涼州總管蒲山郡公匡周之美呂望愧  
其嘉謀平吳之功杜預慙其遠畧公渥洼龍種丹穴鳳  
雛降列象之元精稟成形之秀氣雲生五色一日千里  
起家左親衛府東宮千牛備身趨馳武帳輝映廊廡出  
入龍樓光生道路隋文帝精華已竭義不斷恩始開凌  
長之源將致覆宗之禍公見幾而作謝病言歸優游經  
史晦明藏用風塵靡雜賓友簡通交必一時之俊談必  
王霸之畧尚書令景武公楊素崖岸峻峙天資宏亮壁  
立千仞直上萬尋嗣關西之孔子追陝東之姬旦深謀  
遠鑑獨步當時公年甫弱冠時人未許景武公一見風  
神稱其傑出乃命諸子從而友焉結以始終之期申以  
生死之分暨有隋二世肆虐黔首三象霧塞五岳塵飛  
妖災所臻匪惟血落星隕怨讟所動寧止鬼哭石言輒  
迹遍於天下徭戍窮於海外冤魂塞宇宙白骨蔽原野  
墳塚發掘城郭丘墟萬里蕭條人煙斷絕公與楚公叶  
契共拯橫流未息溟海之波幾及崑岡之火亡自道中  
竄身草澤奮臂大呼羣雄響起豹變梁楚鳳翔鞏洛據  
敖庾而塞轅轅登太行而臨白馬九服諸侯四方豪傑  
或跨州連郡或稱帝圖王合從締交爭亡秦族者莫不

驅茲青犢背彼黑山繫長轂以雷奔望高旗而電集不期而會者以百千數遂大開幕府肇啓伯圖敷七德以宣威掩八紘而取俊鱗羽畢萃草澤無遺于是發人文以化之播仁義以乘之應時機以鼓之總羣策以決之九野風馳六合雷駭彈壓趙燕振驚江漢世克甚昆陽之敗煬帝同望夷之禍化及師殲于黎陽建德稽顙于河朔七國之地四爲我有五都之所三在域中胡騎千羣長戟百萬飲馬則河洛可竭作氣則嵩華自飛近無不懷遠無不肅聲溢寰宇威懾華夷屬人神之乏主以天下爲已任荒裔佇來蘇之望遺黎有息肩之思雖實下民伊賴然非上帝所臨壯志展于人謀雄圖屈于天

命始先鳴乎大樹終垂翅于羣孽乃眷西顧舉茲東夏載驅周道來謁承明帝曰念功降茲休命上柱國邢國公拜光祿卿公雖威未震主自爲謀蓋當世舊部先附多出其右故吏後來或居其上懷漁陽之憤憤恥從吳耿後列同淮陰之怏怏羞與絳灌爲伍負其智勇頗不自安俄屬元帥秦王經營灑洛公亦親承秘策率卒先行旣出鳴雞之關方次休牛之塞詔令旋師更盡嘉謀公想雲夢之僞遊慮青衣之詐及心辭魏闕之下志在江湖之上慕范蠡之高蹈追赤松之遠遊熊耳峰危羊腸路險降吳不可歸蜀無路短兵旣接脩途已窮陰陵失道誰展拔山之力騅馬不逝徒切虞兮之歌臨陣喪元時

年三十有七故吏上柱國黎陽總管曹國公徐世勣等  
表請收葬有詔許焉公體質清明機神警悟五行一覽  
半面十年雅善書劍尤精文史輕一夫之勇學萬人之  
敵至於三令五申之法七縱七擒之功出天入地之奇  
拔幟壘沙之策莫不動如神化應變無窮負縱橫之才  
遇風雲之會望紫氣以驤首凌扶搖而振翮總不召之  
衆問獨夫之罪從我如流三分將二遂有囊括四海之  
意併吞六合之心旣而神器有歸朝宗天闕率從義之  
旅爲勤王之師更以名重自疑功高是懼將遠遊以逃  
難翻途窮而及禍高鳥未盡良弓遽折敵國猶梗謀臣  
已亡天子過細柳而興嗟聞鼓鼙而軫慮雅重事人之

節方申詔喪之禮粵以武德二年某月日葬于黎陽之  
西五里之平原禮也故吏徐世勣等或同嬰世網共涉  
艱難感意氣于一言託風雲于千載所恨並發唐代不  
列元凱之功俱爲漢臣獨漏山河之誓是以慟深纓布  
悲甚向雄慮陵谷之推移勒斯銘于泉戶庶使神遊楚  
國無慙項羽之臣魂往齊都不愧田橫之冢乃爲銘曰  
如馬唐臣猶龍周史宏道百世邁德千祀帶地深源  
極天峻峙玉種逾潤蘭芳不已成形騰氣成象降精餘  
慶種美惟公挺生少表奇智早擅英聲符采發越志畧  
縱橫隋道方衰始聞凌長覩茲兆亂緬然長想閉關晦  
跡招弓莫往盤桓利居不嬰世網運否道銷時逢改卜



朱旗爰指紫靈已哭野戰羣龍馳走原鹿競窺周鼎爭  
亡秦族時遭夔屈連偶鳳翔劬勞百戰經營四方振蕩  
六合牢籠八荒始聞楚霸終基漢皇羣雄並起莫恢王  
度聖人既作皇天乃顧爰茲東夏言遵西路來擬寶融  
寵逾英布爵窮五等位登九棘帷幄參謀高衢騁力海  
運方遙圖南未極縱壑摧鱗摩天墜翼熊耳失路新安  
隕身長男喪楚少女留秦驚魂靡託反葬何因列樹松  
檟惟餘故人

周順陵碑

武后父士彘墓  
長安二年正月

睿宗御書

在咸陽縣北原陵前佛寺內藏石一片如几厚二尺許  
存百許字武三思撰相王旦書趙子函云碑用武氏製

字武三思稱愚猶可而旦亦曰愚旦當發一笑書不知  
真出旦否方整適健可錄也碑已仆於乙卯之地震而  
亡於縣令之修河余猶從故家見其搨本字大徑二寸  
乙巳四月余至咸陽過順陵見陵制壯麗幾與昭乾二  
陵埒南雙闕內天祿辟邪二石獸東西相向高丈許又  
北翁仲十又北石獅二南向尤高大又北爲陵廟舊址  
今爲佛寺三層碑石一片在中楹可坐可卧百許字徑  
可二寸寺後石獸翁仲如前之數又北魏陵也武氏  
爲李家婦竟以女子稱制革命追尊父母此天地一大  
變局令人短氣微狄梁公唐祚不幾隕乎

景龍觀鐘銘

睿宗御製書  
景雲二年九月

今在西安府鐘樓上

景龍觀中宗所作睿宗時鑄鐘製銘觀久毀鐘移西安城鐘樓上在臬署西偏聲聞百里為有唐故物但摹印甚難白日登樓下窺官署鐘錚然有聲匠人印者以草塞其內氈裹其外而後得之銘廣二尺縱少減金石文字記曰初唐人作字尚有八分遺意正書之中往往雜出篆體無論歐虞諸子即睿宗書亦如此猶之初唐律詩稍似古風平仄不盡穩順開元以後書法日盛而古意遂亡遂以篆楷為必不相通分為兩部

紀太山銘

元宗御製御書

開元十四年九月

唐太宗時羣臣請封禪不許曰卿等以封禪為帝王盛事朕意不然誠令天下又安家給人足不封禪何損今

天下殫敝人物凋耗即封禪愈靡靡矣昔秦始皇封禪而漢文帝不封禪後世豈以漢文帝為不及始皇耶且古者事天掃地而祭天神降焉何必登泰山之巔封數尺之土然後展其誠敬乎已而羣臣請不已許之魏鄭公獨爭以為未可帝曰公不欲朕封禪以功未高耶曰高矣德未厚耶曰厚矣以中國未安四境未服年穀未豐天瑞符應未至耶對曰陛下兼此而有之矣然則卿斷斷云不可封禪何也對曰主臣陛下雖有此六者然百姓當大亂之後戶口未復倉廩尚虛呻吟未起而東巡即供億煩費其未易任也且陛下封禪萬國君長皆當扈蹕今伊洛以東至於海岱灌莽極目此為引戎人

入腹中而示之以空虛况賞賚不豐則不能厭其望必豐之雖給復連年固不償百姓勞矣崇虛名而受實害將焉用之帝大感悟事竟寢鄭公匡救愷惻當上心如

此開元帝致治庶幾貞觀不免侈心漸生姚崇既死宋璟罷相張說處中書文章信美矣骨鯁安敢望鄭公未幾林甫國忠進而天下幾亡讀唐史至開元天寶之際恫乎有餘憾焉

開元帝十四年東封禪作紀太山銘大書深刻於穹巖之上王元美云余登太山轉天門見東二里許穹崖造天銘書若鸞鳳翔翥於雲煙之表爲之色飛惜其下三尺許爲揚工惡寒篝火焚蝕遂致百餘字剝落云是時張說有封禪頌蘇頌有封東嶽朝覲序

碑刻明宏治間林埠鑿忠孝廉節四大字於上惡札題名縱橫漶滅不可讀見之悵然後人事事可憎殆不特此王元美云余得一紙於泰安州守家果菴廣三丈高六丈字徑可六寸真足與泰山齊觀矣

孝經注

孝經石臺批答

天寶四載

隸書

元宗御製孝經頌并注皇太子亨篆額今在西安府學墨洞內作大亭以覆之下作石臺高五尺餘琢鬼工猗猗擎扶狀上琢石蓋爲龍螭拏攫狀皆極精緻中石四面各廣五尺高九尺餘束以巨鐵上下通計高將二丈四面遍書每面二十一行每行五十一字小註分寫兩行石瑩潤如玉照人鬢眉朗若明鑑鑿刻精工爲最殊

觀書法與太山銘同老勁豐妍如泉吐鳳如海吞鯨非  
虛語也後有李齊古所進石臺表正書亦佳同勒諸臣  
名字皆秀勁可愛至於行押數行尤豪爽飛動王元美  
謂帝是時為林甫蠱媚極矣猶知有是經耶三子同日  
就隕屬鏤南內淒涼廢食厭代唐家父子如此循覽遺  
跡為之慚慨

鵲鵠頌

元宗御作御書

開元帝篤友于之愛為長枕大被此亦帝王之盛事不  
可以妃子之亂而忽之開元中鵲鵠數千翔集麟德殿  
前右衛率府長史魏光乘作頌帝俯而和之十一章詞  
既稱美字更適逸見於戲鴻快雪諸帖中可貴也

歐陽集古錄云當皇祐至和之間余在廣陵有勅使  
黃元吉者以唐明皇自書鵲鵠頌本示余把玩久之  
後二十年獲此石本於國子博士楊褒又三年來守  
青州始知刻石在故相沂公宅然則此頌宋時已勒  
石矣

金仙長公主碑

元宗御書

在蒲城縣金粟山睿宗橋陵內 明皇行草中有開元  
字面漫漶存一二百字亦在隱見間矯逸異常大都書  
法至開元帝一變文為徐嶠之作有先帝不奪雅志 云  
嶠之亦以書名其子浩又世其學不獨稱率更蘭臺  
父子已也

嵩嶽會善寺批答碑

代宗御書

代宗大歷二年十月內勅于會善寺建戒壇抽律僧七人講律者主僧乘如表謝代宗批答云戒分律儀釋門宏範用申獎導俾廣勝因允在嚴持煩於申謝二十四字書法不及乃祖亦自佳以見唐帝能書者多皆太宗有以啓之也 石在會善寺內一碑列三層上刻大歷二年勅牒中刻乘如謝表下刻批答

上諸帝御書十四種而則天后昇仙太子碑亦爲御製御書不以列于諸帝者惡其瀆也仍歸于嵩山諸碑內

昭陵及陪葬 十六

太宗文皇帝哀冊

廟號太宗文武大聖大廣孝皇帝 貞觀二十三年八月中書令褚遂良撰書今石刻在江南太倉王氏按帝王哀冊刻于玉版藏之寢宮猶卿大夫墓誌刻石藏壙中者也河南公此書藏于昭陵其傳于世者如聖教序及述聖教序記旣奉勅書石于慈恩塔門而又別書立石同州官解卽此意也此哀冊雖出于河南手書而重刻旣多漸失其真妍媸互見予收二三本筆法皆不同存其彷彿而已

虞公溫彥博碑

岑文本撰歐陽詢正書 貞觀十一年十月

在太宗昭陵貞觀十一年二月詔功臣密戚許陪葬昭

陵今按陵圖陪葬百六十墓現存墓碑十六通此碑卽以貞觀十一年十月立蓋應詔之始也碑殘缺計三十六行祇存上截三百餘字按唐書恭公以貞觀十年薨年六十四而歐陽信本年八十餘矣而字猶精健乃爾顏魯公家廟碑文史稱温大雅與思魯顏魯公高祖同事東宮彦博與愨楚同直內史省彦將與遊秦同典校秘閣二家兄弟各爲一時人物之選少時學業顏氏爲優其後職位温氏爲盛其爲通賢所稱若此

尚書右僕射申公高士廉瑩兆記

在昭陵 許敬宗撰趙模正書以貞觀二十一年薨壽七十二石殘缺存百餘字不知葬年月 碑側云會昌

四年五月四日六代孫尚書左丞元裕拜瑩所一云六代孫正議大夫行給事中上柱國渤海縣開國男食邑三百戶賜紫金魚袋少逸謹附名題於碑側會昌四年五月十五日

房梁文昭公元齡碑

在昭陵褚遂良書 舊唐書公諱喬字元齡碑曰諱元齡字喬新唐書從碑以貞觀二十二年薨年七十此碑計三十四行止存上截尺許計每行有二十餘字可觀文不知誰撰

中書令高唐公馬周碑 隸書

在昭陵 許敬宗撰殷仲容分書貞觀二十二年薨碑

殘缺存三百許字有永徽二年贈尚書右僕射詔

國子祭酒孔憲公穎達碑于志寧撰正書  
貞觀二十二年

在昭陵 碑殘缺趙子函謂公有功六經鬼神呵護故

碑多可讀今殊不然也計三十四行上二尺許寥寥數

字可觀規摹虞褚法史字仲達碑字冲遠當從碑貞觀

二十二年六月十八日薨年七十五皆隱隱見于碑者

芮公豆盧寬碑

在昭陵 永徽元年卒據金石錄李義府撰不知誰書

豆盧代北著姓魏太和中稱單姓為盧寬乃隋文帝

之外孫為梁泉令高祖定關中與刺史蕭瑀同赴京師

累授殿中監子懷讓尚萬春公主貞觀中歷禮部尚書左

衛大將軍封芮國公

太常寺卿汾陰獻公薛收碑

在昭陵 殘缺存百餘字據金石錄于志寧撰不知誰

書武德七年薨最早年三十三碑額題唐故太常卿上

柱國汾陰獻公薛府君之碑

司徒衛公李靖碑正書

在昭陵 許敬宗撰王知敬書顯慶三年 墓準衛霍故

事為陰山烏德韃山狀土人謂之上三塚王知敬與虞

褚諸公入內府者昭陵碑多殘缺此獨有千餘字可讀

顧寧人金石記曰其文曰閔茲視突突即肉字謂魚

愚之人也史記李斯傳禽鹿視肉索隱曰禽鹿猶禽獸

也言禽獸但知視肉而食之莊子及蘇子曰人而不學譬之視肉而食文子言人有二十五等其二十四等謂之肉人廣韻月俗作突越絕書陳音對越王斷竹續竹飛土逐突作此突字乃俗書也而今人以爲古字誤矣宋元祐四年二月游師雄別立石碣于唐碑側刻云唐特進衛國公李靖以貞觀二十二年薨年七十九贈司徒并州都督陪葬昭陵墳制如衛霍故事起冢象鐵山積石山以旌殊功今按其墳在昭陵之左北距山麓三里南距今醴泉縣三十五里冢爲三山之狀主山與西山迤邐相屬而東北者勢若斷絕別爲一山疑其一象積石而一象鐵山也其高五十五尺東西七十五尺

周圍一百五十五步遺跡雄偉見之者無不嘆其英槩能以功名始終真一代之名臣也前神道碑乃許敬宗撰王知敬書其座元無鼇制規模皆削于英公未詳其然也訪古者可以觀焉

禮部尙書張允碑

在昭陵碑殘缺不知撰書顯慶三年額題曰大唐故禮部尙書張府君之碑按太宗曾受學于張及文皇卽位尙在下僚乃自請老文皇始悟置酒宴之尋以對孔門弟子稱旨授國子祭酒卒加禮部尙書陪葬昭陵甲午十一月二十五日往賀來素爲此記之

蘭陵長公主碑正書



在昭陵 碑殘缺據金石錄李義府撰不知誰書首云  
太宗第十九女也顯慶四年薨年三十二駙馬竇懷慈  
封長公主

太子少師崔敦禮碑 正書

在昭陵 據金石錄爲于志寧撰殘缺不知誰書顯慶  
年間卒碑額書太子故少師中書令固安文昭崔公碑  
陽翟侯褚亮碑 八分書

在昭陵 碑漫漶存五百餘字不知撰書姓字以貞觀  
二十一年薨壽八十八碑額題曰大唐褚卿之碑文內  
有龍朔封陽翟侯數字可見

大將軍許洛仁碑 正書

在昭陵 碑殘缺不知撰書人隱隱可見者破宋老生  
有功年八十八諡曰勇龍朔二年

大將軍阿史那忠碑 正書

在昭陵 殘缺不知卒葬年月撰書姓氏額書大唐故  
右驍衛大將軍薛國貞公阿史那府君之碑

右武衛將軍乙速孤行儼碑 分書開元十三年

在昭陵北五十里叱干村東與其父左領軍將軍神慶  
墓相去十餘步劉憲撰白羲晷分書 此碑去昭陵最  
遠

右唐太宗昭陵自哀冊而下現存碑石十六通李英  
公碑乃高宗御書編次諸帝之列今此十五碑彙爲

一帙以便省覽余另有昭陵石蹟考畧三卷

按冊府元龜貞觀十一年二月丁巳詔曰佐命功臣  
義深舟楫或定謀帷幄或身摧行陣同濟艱危克承  
鴻業追念在昔何日忘之使逝者無知咸歸寂寞若  
營魂有識還如疇曩居址相望不亦善乎漢氏使將  
相陪陵又給以東園秘器篤終之義恩意深厚古人  
之志豈異我哉自今以後功臣密戚德業尤著如有  
薨亡宜賜塋地一所及秘器使其窀穸之時喪事無  
缺所司依此營備稱朕意焉二十年八月丁亥詔曰  
周室姬公陪於畢陌漢庭蕭相附彼高園寵賜墳塋  
聞諸上代從窆陵邑信有舊章蓋以懿戚宗親類本

同之枝幹元功上宰猶在身之股肱哀榮之義實隆  
始終之契斯允今宜恪遵故實取譬拱辰庶在鳥耘  
之地無虧魚水之道宜令所司于昭陵南左右廂封  
境取地仍卽標識疆域擬為葬所以賜功臣其有父  
祖陪陵子孫欲來從葬者亦宜聽允

醴泉縣志曰昭陵諸碑若文皇后碑止存願顛長孫  
無忌碑存而字盡滅其碑字尙有存者僅二十一片  
房元齡存五百餘字褚遂良書高士廉存三百餘字許敬宗撰  
趙模書段志元存八百餘字張後允馬周蘭陵公主各  
存六百餘字公主碑李義府撰姜遐許洛仁各存九  
百餘字姜碑姪廓公端撰書孔穎達存千字于志寧撰阿史那忠崔

敦禮各存七百餘字崔碑于志寧撰子立政書豆盧寬存四百餘

字李義府撰薛收張阿難監門將軍王君各百餘字徒存

形似惟唐儉存字千一百乙速孤行儼存字千四百

劉憲撰白義李靖存字千五百許敬宗撰李勣存字

千八百乙速孤昭祐存字二千五百餘苗神

釋行又一碑存字百五六十可辨而前有蘭陵公主

字中有詔詞曰第十九女則公主或有二碑不可知

此崇禎十一年苟好善所修志云又二十六年而余

至陵下時值雪後空山無人未及徧訪僅見李衛公

一碑其下截俱剝去後又購得四五碑皆然且有并

其序而仆之者矣金石文字記

趙岫曰萬曆戊午四月余為九嶷之遊距昭陵十里

宿高生儼家翌日同行北一里許得許洛仁碑又北

半里許得薛收詩似昭仁寺碑駸駸有伯施法折而

西一里許為趙村村有廣濟寺寺後石鼓唐人書尊

勝經咒精健絕倫止存十三從趙村北行里許為莊

河村未至先于道旁冢得姜遐斷碑至村則有段志

元碑東行數十步有監門將軍王君碑橫于田間又

東行數十步一碑無字亦無冢蓋土人平之而并磨

其碑耳以圖考疑是長孫無忌碑又東行半里許為

劉洞村流水界之渡而東有房梁公元齡碑褚河南

正書又東數十步有高士廉碑又東數百步有李靖

碑撰書姓氏殘缺與諸碑同而上半完好靖冢作三  
山形文皇以象其功土人謂上三冢李勣冢亦如靖  
土人謂下三冢二冢南北相去不二里勣碑高宗御  
書高二丈餘嶄然屹立與溫彥博碑搨者甚多土人  
捶其字殆盡彥博碑在靖碑北數十步歐陽詢書書  
法視皇甫九成化度三碑最爲得中而不復可搨至  
西峪村村東南古冢相連有褚亮碑阿史那忠碑張後  
允碑孔穎達碑豆盧寬碑張阿難碑鱗次都不百步  
書與段姜等碑皆有法而孔碑極類虞伯施但結構  
小疎昔人謂爲伯施書非也穎達卒在世南後當是  
習世南者書之爾旣而又得蘭陵公主碑于老軍營

之西北得馬周碑于狗村之東得唐儉碑于小陽村  
之北又得崔敦禮碑又有尉遲敬德碑自額以下埋  
土中聞十五年前人苗質田掘而搨數十紙余出之了  
無一字又山半數冢土人謂宰相墳仆一碑傳是魏  
鄭公碑其東山半數冢土人謂亂冢仆二碑余皆起  
之則與尉遲碑同蓋土人捶而仆且瘞之也又明日  
登山謁昭陵有六馬皆以片石刻其半左右各三陵  
北四十五里叱干村村東二冢一爲乙速孤昭祐碑  
苗神客撰釋行滿正書一爲乙速孤行儼碑劉憲撰  
白羲暄分書地僻搨者少故得稍完  
林同人曰趙子函以萬曆戊午遊昭陵家本秦又得

賢主人極搜討之樂顧瞻低徊穹碑豐碣仆者起之  
埋者出之百六十殘篇斷簡猶得二十餘種至崇禎  
丁丑方二十年苟公好善修醴泉縣志所載昭陵碑  
目悉同趙公所見又二十八年爲康熙甲辰余過昭  
陵經鼎革之後耳目非舊而余乃倩工搜揚僅得英  
衛房馬諸公十六碑字之存者已不能如趙公所云  
耳若段志元唐儉姜遐阿那難監門王君及蘭陵公  
主別碑皆亡矣又三十年余重遊西涼過關中時秦  
方大饑百里斷人煙昭陵一徑化爲萑苻之藪行旅  
裹足竊意前所存十六碑將復沈沒于寒煙衰草中  
後人不得而見也每翻閱碑本愈加珍重作爲昭陵

石蹟考畧三卷慨雄風之不作傷帝制之將湮不禁  
寄愁天上云爾 杜甫行次昭陵舊俗疲庸主羣雄  
問獨夫讖歸龍鳳質威定虎狼都天屬尊堯典神功  
協禹謨風雲隨絕足日月繼高衢文物多師古朝廷  
半老儒直詞寧戮辱賢路不崎嶇往者災猶降蒼生  
喘未蘇指揮安率土盪滌撫洪爐壯士悲陵邑幽人  
拜鼎湖玉衣晨自舉鐵馬汗常趨松栢瞻虛殿塵沙  
立暝途寂寥開國日流恨滿山隅 重經昭陵草昧  
英雄起謳歌歷數歸風塵三尺劍社稷一戎衣翼亮  
貞文德丕承哉武威聖圖天廣大宗祀日光輝陵寢  
盤空曲熊羆守翠微再窺松栢路還見五雲飛

闕里孔子廟

六

孔廟詔表碑

在曲阜縣廟中武德九年十二月詔一通卽太宗卽位之初年高宗乾封元年詔一通太子宏表一通乾封元年祭文一通共爲一碑隸書出一手王元美曰其行筆不甚精工而時有漢意乃知古法自開元帝始盡變也金明昌二年七月一日暴風折木壓其碑仆于地龜跌分爲二碑與字俱無害豈陰有所相而然耶九月一日復命工易以此座云

開州刺史高得裔記

贈泰師孔宣公碑

隸書

在曲阜縣孔廟崔行功撰孫師範分書乾封元年 顧

寧人金石記曰碑文內升升二字升音陞升音蚪隸釋

漢苦縣老子銘有升星字司隸校尉楊孟文石門頌上

順升極白石神君碑米升五錢註並云斗字

漢隸分韻升什二字

上斗唐比邱尼法琬書天分斗極竟作升字則謬矣昔

人以其文易混故改升爲斗俗作斗而二字多有誤者

故漢書食貨志治日勤謹則畝益三升不勤則損亦如

之臣瓚曰當言主斗尙書帝命驗黃曰神斗博雅誤作

神升又世語姜維膽大如升誤作斗

修孔子墓碑

在曲阜縣廟中開元七年李北海邕撰張庭珪書邕文不及書此碑是已庭珪名書書小史謂邕文必致珪書

齊金石考卷中  
而評者有古木崩沙閒花映竹語觀此亦未爲的然但書趙盾作趙遁何也

堯公之頌 正書

在曲阜孔廟張之宏撰包文該書天寶元年四月 舊唐書禮儀志開元二十七年八月制追諡孔子爲文宣王贈顏子淵堯公閔子騫費侯冉伯牛鄆侯仲弓薛侯冉子有徐侯仲子路衛侯宰子我齊侯端木子貢黎侯言子游吳侯卜子夏魏侯又贈曾參顓孫等六十七人皆爲伯

文宣王廟門碑

在曲阜縣孔廟 裴孝智撰裴平書大曆八年十二月

修文宣王廟記

在曲阜縣賈防撰無書者名 咸通十一年三月 孔子三十九世孫溫裕以私俸奏請葺廟蒙獎中書門下牒一道

曲阜孔廟碑石林立自漢至隋凡七碑已編于前唐碑凡六通序次如右自宋而下不詳錄焉

嵩嶽境內

北二

嵩嶽會善寺造像記

八分書

麟德元年十月

今在本寺大殿前右

少林寺金剛經

正書

王知敬書

咸亨三年

是時元熒奉勅再于東都譯諸佛經佛法方盛之始天

子尚加敬信知敬書此經所由來矣第石質似惡刻亦未精剝蝕太甚存者不及半正可與李靖墓碑參看 嵩嶽諸碑自漢開母廟石闕至唐狀嵩高碑凡二十七種俱楚黃葉井叔先生所貽

天后御製詩 在少林寺 王知敬正書 永淳二年九月

武后既殺王皇后宮中時有崇故常居東都嵩山諸勝多所遊覽而三十六峰碑碣亦惟此時為盛

王徵君口授碑 正書

在嵩山老君洞南 垂拱二年四月 徵君即王孚宗

也 弟紹宗甄錄并書

封祀壇碑

在登封縣西萬羊岡 武三思撰 天冊萬歲二年薛

曜正書下截剝蝕

中嶽體元先生潘尊師揭文

在嵩山老君洞 王適撰 司馬承禎八分書 聖歷二年

昇仙太子碑 在偃師縣南三十五里 武后御製 并書 聖歷二年六月

王元美謂文似北門諸學士手筆意軟媚無鐵椎椎悍馬時意氣且既為太子立碑而以蓮花六郎稱其後身得不穢千古青簡耶趙子函云碑首昇仙太子之碑六大字飛白書作鳥形亦佳飛白書久不傳于世此其僅存者耳葉井叔先生以此碑寄余未有額為之一張乃行書甚虬健有致非直柔也 惡其亂常因不列于御書



夏日遊石淙詩并序

凡十六人在嵩山石淙北崖

久視元年五月天后自製七言一首侍遊應制皇太子

思顯太子左奉裕率兼檢校安北大都護相王思旦太

子賓客上柱國梁王思三思內史思狄仁傑奉宸令思張

易之麟臺監中山縣開國男思張昌宗鸞臺侍郎思李

嶠鳳閣侍郎思蘇味道夏官侍郎思姚元崇給事中思

閻朝隱鳳閣舍丞思崔融奉宸大夫汾陰縣開國男思

薛曜守給事中思徐彥伯右玉鈐衛郎將左奉宸內供

奉思楊敬述司封員外思于季子通事舍丞思沈佺期

各七言一首

秋日宴石淙序

在嵩山石淙南崖 張易之撰 正書闕年月疑與夏

日同時之事

道安禪師碑

在嵩山廢戒壇寺西南 宋儋撰併行書 開元十五年十月

宋儋開元中人明甚淳化閣帖編入隋朝王著之不學

乃爾

少林寺碑

在寺大殿東南鐘樓下 裴漼撰併行書 開元十六年七月

裴懿公負文筆號霹靂手不以書名而此文殊不及書

書法秀勁漸升伯施之堂 此碑上方刻秦王告少林

寺教元宗書太宗文皇帝御書七大字其陰刻開元賜

田牒一碑前後三刻

景賢大師身塔石記

在嵩山會善寺 羊愉撰 沙門溫古行書 開元二十五年八月

葉井叔云按王維有留別溫古上人兄詩云宗兄此削髮蓋其族人亦必可稱者也

嵩陽觀聖德感應頌

在登封縣故嵩陽觀遺址 李林甫上徐浩八分書 裴迴題額天寶三載

石高一丈廣五尺八寸計二十五行每行五十字碑高大為諸碑冠宋廣平碑方豪記云高二丈許然石身不過八尺廣僅五尺若此碑下龜上螭更不知如何壯麗惜乎其為林甫所上與道士孫太冲煉丹九轉諛飾方術以邪事主不足稱矣

少林寺靈運禪師塔銘

崔琪撰沙門勤口行書天寶九載四月

今在寺中碑頂有字云寺西石塔靈運師墳即梁帝皇嗣者也以其為梁武帝之裔而稱皇嗣亦為不順其陰

刻陀羅尼經咒

金石文字記

嵩嶽永泰寺尊勝咒石幢

在寺內庭西天寶九載

楊慎行書

永泰寺碑

沙門靖彰撰

荀望行書

天寶十一載閏三月

今

在嵩山永泰寺

會善寺戒壇勅牒

行書大曆二年十一月

今在嵩山會善寺西上層刻中書奉勅牒中層刻沙門乘如謝表下層刻代宗御書批答二十四字

大證禪師碑銘

王縉撰

徐浩正書

大曆四年

今在嵩岳寺

梵綱經心地戒品等經

高堅正書 大曆十三年正月 今在嵩門會善寺後

一碑兩面

會善寺戒壇記

陸長源撰 陸郢八分書并篆額 貞元十一年七月

少林寺厨庫記

顧少連撰 崔漑正書 貞元二十年

狀嵩高靈勝詩

尉遲汾撰

正書

大和三年六月

今在中嶽廟壁有宋熙寧丁巳王紳題字 題云府尹

王侍郎准制拜嶽準字作准

顏魯公書 二十四

多寶佛塔感應碑

在西安郡庠 顏真卿正書

岑勛撰 天寶十一載

趙子函云魯公此書最著以其字比諸碑稍小便于展玩耳而結法視東方讚家廟碑似覺少遜王元美曰貴在藏鋒少遠大雅不無佐史之恨信然碑舊在興平千福寺不知何時移立西安府學中岑參有羣羊福寺楚金禪師法華院多寶塔詩

東方朔畫像贊

在山東陵縣 顏真卿正書

夏侯湛撰贊 天寶十三載

余少時鄉人有為陵令者以此碑一紙餉旅館主人余見悅之及長問其家無有也後自秦抵開州去陵邑四五百里其令秦人以世好求之得四紙歸闕偶置別舟下建溪觸石舟破碑紙損裂愧趙子固之護蘭亭猶補

綴得一本裝潢頗精護以佳木又為人竊去悵惘久之  
後于故家得舊搨本後又得畫贊而缺碑陰亦可無憾  
矣記此以見收藏之不易子孫其識之 右軍作畫贊小  
楷風流蘊藉為百代模式魯公忽大書深刻巖巖氣象  
有垂紳搢笏之容皆東方先生之所顧盼而深喜也

祭伯父豪州刺史文

祭姪贊善大夫季明文

二文俱乾元元年魯公文稿也石本有單行者有見於  
各法帖中者

華嶽題名記

在嶽廟真享碑東側  
乾元元年十月

顏真卿正書

魯公自蒲州刺史除饒州與監察御史王延昌穆寧評  
事張澹華陰令劉暉主簿鄭鎮同謁廟題記字徑二寸  
僅百八十四字

郭汾陽王家廟碑并陰

在秦藩司內下庫御題額顏真卿撰并書  
廣德二年十一月

汾陽忠武王子儀為父太保敬之作家廟立碑魯公為  
之并書當矣相傳今秦藩司乃當年汾陽府第故其立  
碑地今為下庫雖有亭覆之輿皂居處豈知愛護故石  
微漫漶即承宣者亦未必知所重也余嘗一至亭前不  
知牝狗育子其下狂吠而出羣犬隨之幾至狼狽疾奔  
得免好事之報每思及輒發一笑 碑面書文及銘碑  
陰行筆則列汾陽兄弟子姓官爵俱列大位太保九男  
長子琇次子儀三子雲四子瑛五子珪六幼賢七幼儒

八幼明九幼冲史止載汾陽弟幼明一人而子儀官封  
史與碑亦多不合錄之以備攷 子儀武舉及第授左  
衛長上改河南府成臯府別將又改同州興德府右果  
毅左金吾衛副隊長上又改汝州魯陽府折衝知右羽林  
軍長上又遷桂州都督府長史充當管經畧副使又改北庭  
副都護充四鎮經畧副使又除左威衛中郎將轉右司  
禦率兼安西副都護改右威衛將軍同朔方節度副使改  
定遠城使本軍營田使又加單于副大都護東受降城  
使左廂兵馬使又拜右金吾衛將軍兼判單于副都護  
又拜左武衛大將軍兼安北副都護橫塞軍使本軍營  
田使又兼充天德軍使安北副都護又兼豐州都督西  
受降城使右廂兵馬使改衛尉卿兼單于安北副大都  
護靈州刺史攝御史中丞充朔方節度關內支度營田  
鹽池押諸番部落副大使知節度事六城水運等使又  
拜御史大夫餘並如故又拜兵部尚書同中書門下平  
章事兼單于安北副大都護靈州大都督府長史節度  
等使餘如故又特加銀青光祿大夫又拜司空餘如故  
又充副元帥餘如故又拜尚書左僕射同平章事兼武  
部尚書餘如故又加朔方管內採訪處置使又加司徒  
封代國公食實封一千戶餘如故又兼中書令司徒兼  
靈州大都督府長史單于鎮北副大都護朔方節度等  
諸使餘並如故又充東京畿及山南東道并河南等道

諸節度防禦兵馬元帥仍權知東京留守判留司尙書  
省事餘如故又兼邠寧鄜坊等兩道節度使又封汾陽  
郡王知朔方河中北庭潞儀澤沁等節行營兼興平定  
國等軍兵馬副元帥仍充本管觀察處置使餘並如故  
加實封五百戶又加實封二百戶又充關內副元帥餘  
如故又兼上都留守餘如故又兼河東副元帥河中節  
度本道觀察處置等使兼河中尹餘如故又兼靈州大  
都督單于鎮北大都護充朔方節度大使及關內支度  
營田鹽池押諸番部落等使六城水運使管內觀察處  
置使餘如故又拜太尉兼河西副元帥通和吐番等使  
餘如故又拜尙書令兼中書令餘如故○大保孫見于

碑者十三人

曜

旰

晞

晫

晤

昉

暖

晁

曉

曙

昫

映

暉

上

皆有官爵

惟曜與晞俱稱

太原縣開國公

曾孫見碑者二人刻名處爲人所壞

一曰守太府少卿一曰守國子監主簿

余從郭氏寵命

錄抄當日碑石所未載者世次于後汾陽有大勲于唐  
室宜其後之以熾而昌也 旰子儀次子晞子儀三子

兵部尙書封趙國公

暖子儀六子卒贈尙書左僕射

以女爲憲宗后穆宗太后復贈太尉 曙子儀七子先

金吾大將軍卒封祁國公 昕子儀姪幼明之子安西

大都護四鎮節度使

旼子儀姪郭太后叔父封鄭國

公 曜太子太傅諡曰孝

郭太后穆宗母憲宗后也

為暖尙代宗長女昇平長公主之女追贈曾祖太保追封岐國公敬之贈太傅父暖為太尉母號國長公主為高國大長公主 釗暖之子工部尙書劍南西川節度入為太常卿檢校司徒郭太后兄也 縱金吾大將軍卒贈尙書左僕射尙順宗長女漢陽公主 銀太子詹事 仲恭尙穆宗第四女金堂公主銀青光祿大夫仲詞尙穆宗第六女饒陽公主釗之第三子也銀青光祿大夫襲封太原郡公 仲文殿中少監 以上抄 忠武 寵命錄 王陪葬肅宗建陵 陵內陪葬 止王一人 右武將山與太宗九嶼山昭陵相連而稍西北何以無墓碑或經後人埋沒未可知也郭氏子孫今尙盛住居華下華州之東路旁有郭

汾陽故里石碑此地山川亦極秀麗云 集古錄有忠

武公將佐畧碑云貞元十二年陳翊撰翊之所書亦為

盛矣猶言得其六七蓋其官至宰相者七人為節度使

者二十八人尙書丞郎京尹者十人為察使者五人據

翊所得而書者實六十人而顯名于世者蓋五十人雖

喬琳周智光李懷光僕固懷恩等陷于禍敗然杜鴻漸

黃裳李光弼光進之徒偉然名見于當時而垂稱于後

世者亦不為少豈惟得失相當而已哉雖汾陽功業士

多喜附以成名然其亦自有以得之也其忠信之原固

出其天性至于處富貴保功名古人之所難者謀謨之

際宜亦得其助也 案碑太保孫十五人次曰黈四日所曾孫三人曰 通直郎行將作丞銳次曰銑次曰鋒來齋失載

贈工部尚書臧懷恪碑

在三原縣北原 李秀巖篆額 顏真卿撰并正書 大曆中

魯公此碑比家廟諸石風骨特秀勁下截為田夫磨礮無完字上半精采奪目可寶也 按碑公諱懷恪東莞

人今之沂州非粵之東莞魯公與臧氏交厚碑云自驃騎以還世以材雄朔陞迫于今茲蕃衍彌熾自天寶距

于開元乘朱輪而拖珪組者尚望國都云云懷恪七子皆仕于朝少子希讓為代宗都虞候渭北節度使封魯

國公懷恪以子貴自右武衛將軍三贈至工部尚書兄懷亮右羽林軍大將軍魯公又為臧氏書故宅碑糾宗

碑縣志載之今皆亡矣

宋州八關齋會石幢

在歸德府 顏魯公撰并正書 大曆七年 首篆文宋州八關齋會報德記

節度田神君項疾愈州將徐向等為之齋會作石幢以

記之其事不足重以魯公書重之耳石幢八角每角濶

八九寸高八尺

茅山碑

在茅山 顏真卿撰并正書 夏五月 案此石端先生李君碑石已碎今置勾容學宮

魯公此碑字與顏家廟大麻姑壇相埒得之友人斷篋

中十損二三缺其首尾未獲考其年月

案金石文字記大曆十二年五月

麻姑壇記

在撫州南城縣東南二十里麻姑山中 大曆六年四月

都元敬金薤琳琅去右唐小字麻姑壇記顏真卿撰并

書今在江西南城縣之麻姑山歐陽公謂疑其非真而

復以為筆畫有法非魯公不能書也趙明誠謂陳無已

嘗見黃魯直言此乃慶曆中一學佛者所書魯直能道



其名及觀陸放翁云魯公麻姑壇記有大小二本蓋用羊叔子峴山故事通志金石畧載魯公書亦有小字麻姑壇記則歐陽公之疑與魯直之言又似不足信元柳待制道傳云麻姑壇碑小字楷法尤精緊比聞舊石焚毀山中雖重刻而失真顏魯公書麻姑壇記有大字小字兩石都元敬考論詳矣余昔過南城登麻姑壇山見小字石已漫漶而諸家所刻幾十數種雖非原本皆足見魯公書法風骨姑收此兩紙以存梗概若大字本則絕無而僅有戊寅春暮余于鶯脰湖潘次耕先生家見之字大如臧懷恪碑宛若新刻宋搨何疑真可寶也又余齋所藏帖字大莫如中興頌字小莫如麻姑壇皆魯公筆所謂神龍屈伸不可端倪也侗記

磨崖中興頌

在祁陽縣浯溪石崖上 元結撰 顏真卿大書正字 大曆六年四月

磨崖石元宗泰山銘字體最大八分書若正書字大者則以此頌爲第一而結體最小者莫若麻姑壇皆魯公手筆元結序云非老子文學者其誰宜爲王元美謂首句噫嘻前朝孽臣姦驕非頌體此石本予得之舊家若今搨無此完好矣頌石後有黃庭堅讀中興頌詩宋刻漫漶畧可讀明華亭董元宰以白松綾五幅自書讀浯溪頌詩漫郎左氏癖魯公羲之鬼千載遠壇場同時恰對壘有唐九廟隨秋煙一片中興石不毀幾回吹律寒谷春幾度看碑陳迹新遼鶴歸來認城郭杜鵑聲裡舍

君臣折釵黃絹生光怪舊國江山餘氣概當年富貴腹  
劍多異代風流椽筆在書生何負于國哉元祐之籍何  
當來子瞻飽喫惠州飯涪翁夜上浯溪臺扶藜掃石溪  
聲咽不禁技癢猶題碣清時有味是無能但漱湘流莫  
饒舌綾色如新墨光映射魯公千載後不得不推為擅  
場予力不能得不知為何人所有 宋馬永卿曰中興  
頌云復復指期此兩字出漢書匡衡傳云所更或不可  
行而復復之註云下復扶目反又何武為九卿時奏言  
宜置三公官又與翟方進共奏罷刺史更置州牧後開  
復復故註云依其舊也下復扶目反 金石文字記

右丞相廣平文貞公宋璟碑

在沙河縣西北八里墓前顏直卿撰并書  
大曆七年壬子碑側記大曆十三年戊午

石高八尺廣四尺厚一尺一寸四面遍書前後面皆二  
十七行每行五十二字左右旁皆七行每行五十字歲  
久已斷仆于地明沙河令方豪起而立之另有碑記碑  
側記乃魯公續書宋世卽已缺裂崇寧間范致君別刻  
于石迄今五百餘載石復剝蝕而文隱隱可讀也邢州  
司李蕭蟄菴震梓而傳之補史所未備亦恐碑石湮沒  
不彰予裝錄側記于裝本之末今再錄于此 初公任  
監察御史持服于沙河縣屬突厥寇趙定州河朔兇懼邢  
州御史黃文軌投艱于公公以父母之邦金草無避及  
賊至城下公為曉陳禍福其徒有素聞公威名者乃相  
率而去之開元末西安都護趙含章冒于貨賄多以金

帛賂朝廷之士九品以上悉皆有名其後節度范陽事  
方發覺有司具以上聞元宗切責名品將加黜削公一  
無所受乃進諫焉元宗納之遂御花萼樓一切釋放舉  
朝皆謝公衣冠儼然獨立不拜翌日入奏元宗謂公曰  
古人以清白遺子孫乃卿一人而已公曰含章之賄偶  
不至臣門非不受也元宗深嘉歎之前碑缺故畧述于  
此公第三子渾之爲中丞也方欲陳乞御製碑頌未果  
而中受譴謫旋 羯作亂事竟不成真卿時忝監察殿  
中爲中丞屬吏故公孫儼泣請真卿論撰之昭義軍節  
度觀察使尙書左僕射兼御史大夫平陽郡王薛公曰  
嵩以文武忠義之資爲國保障上慕公之德業歎尙無

窮次加儼之懇誠崇監莫致迺命屯田郎中權知邢州  
刺史封演購他山之石曳以百牛僞刻字之工成乎半  
歲磨礮旣畢建立斯崇遠近嗟稱古今榮觀雖大賢爲  
德樹善庸限于存亡而小子何知附驥託跡于階序真  
卿刺湖州之日因成 文請儼刻其側而志之未及雕  
鐫而公第八子衡因謫居沙州叅佐戎幕河隴失守介于  
吐番以功累拜工部郎中兼 御史河西節度行軍司馬  
與節度周鼎保守燉煌十餘歲遂有中丞常侍之拜恩  
命未達而吐蕃圍城兵盡矢窮爲賊所陷吐蕃素聞太  
尉名德曰唐天子我之舅也衡之父舊賢相也落魄于  
此豈可留乎遂贈以駝馬送還于朝大曆十二年十一

月以二百騎盡室護歸士君子偉之乃古來所無也上  
欲特加超獎且命待制于側門十三年春三月吏部尙  
書顏真卿記 按文貞開元二十五年丁丑冬卒壽七  
十五明年戊寅夏葬碑立于大曆七年壬子自丁丑至  
壬子凡三十六年又六年戊午爲大曆十三年復有碑  
側之記顏文忠興元元年甲子秋卒于希烈之難壽七  
十六遡壬子書碑時文忠年六十有四書碑側時文忠  
年七十矣文貞卒時文忠年始二十九開元五年文貞  
同平章事文忠方九歲乃自少而壯壯而老世變屢更  
而巍巍豐碑必出文忠手筆此中謂非有神合乎千載  
下見其遺跡而想其德徽令人慨慕之無從也 蕭蟄

菴至邢訪文貞公後二十四世孫道亨攜族譜來公子  
七六無譜獨第六子華譜甚詳華子儼蘇州刺史儼兩  
子長嗣先左補缺次嗣宗奉化令家焉明景泰初兵部  
侍郎諱玉者公十七代孫也過邢有望墓詩其家南和  
者十七代而絕宏治間南和令朱銳於奉化取公十九  
代孫伍來以守祠自伍至道亨凡六世今家沙河者有  
餘人皆業農家南和者僅亨一人家奉化者久不相往  
來蟄菴震記

孔子廟殘碑

在華州

程浩撰

顏真卿正書

此文載于唐文粹爲扶風縣文宣王廟記大曆二年駕  
部郎中程浩文而今西安府學有僧夢英書此一記其

元在湖州臨安縣夢英愛而書之豈駕部先作此于扶  
風魯公又書之于湖州而去其半篇耶又考唐地里志  
臨安縣屬杭州不屬湖州得非夢英之誤耶今華州有  
此殘碑數十字其文同 金石文字記

爭坐位帖

在西安郡庠聖教序亭內  
右廟西窗臺行草

此魯公為檢校刑部尚書時與定襄郡王郭英又書稿論  
會朝不宜讓內侍魚朝恩居上坐侃侃其詞俗謂爭坐  
位帖 沈括夢溪筆談曰都堂及寺觀百官會集坐次  
多出臨時唐以前故事皆不可考惟顏魯公與郭英又  
書云宰相御史大夫兩省五品供奉官自為一行十二

衛大將軍次之三師三公令僕少師保傅尚書左右丞  
侍郎自為一行九卿三監對之從古以來未嘗參錯此  
亦畧見當時故事 趙子函曰不知何時上石石已泐  
矣而法猶可尋王元美云無一筆不作晉法所謂無意  
為文從容中道者也又云公剛勁義烈之氣文不能發  
而發之于筆墨間余嘗謂公學不如其人于麻姑壇記  
見之詞不如筆楷不如行有意不如無意于此帖見之  
而都元敬乃謂草草之筆亦為摹刻目中有筆余不能  
不服膺元美此碑雖泐而顏公筆法宛然近董氏摹入  
戲鴻堂帖乃云陝省者不足觀而自謂存魯君法度今  
以余觀董氏刻視此則神亡矣 此石質粗多麻孔幸

字畫皆未損摹刻不精遂致模糊余至郡庠墨洞與印工對坐竟日紙墨力俱佳僅得兩本觀者謂為重刻又謂舊搨董氏誇有宋搨本想亦如是恨未一見

顏氏家廟碑

在西安郡庠 顏氏家廟之碑

李陽冰篆額 顏建中元年建

唐末喪亂其碑倒于郊野宋太平興國七年都院孔目官李延襲移建學宮立于明皇孝經石臺亭東北向

碑首行題曰唐故通議大夫行薛王友柱國贈秘書少

監國子祭酒太子少保顏君廟碑銘乃魯公父也次行

第七子光祿大夫行吏部尚書充禮儀使上柱國魯郡

開國公真卿撰并書 君諱惟貞字叔堅其敘先世或

稱諱某若伯叔祖父羣從則直書其名碑文已詳石四

面遍書額已題字額陰片石方廣如前魯公書云高祖

記室君國初居此宅號州君舍人君侍焉堂今置廟地

高祖妣殷夫人居十字街西北壁第一宅秘書監君禮

部侍郎君侍焉號州君居後堂華州君子堂中生焉今

充神厨少保君堂今充齋堂廳屋充亞獻終獻齋室共

八十五字人不知摹搨塵土封翳余拂拭摹出碑石高

八尺廣四尺七寸厚一尺五寸前後面皆二十二行每

行四十七字左右旁皆六行每行五十字字比前後面

畧小額字反差小

顏魯公與蔡明遠書

行草 拓本

二帖并依金石錄附于大唐之末

奉使蔡州題字 建中四年

在同州其中有魯公畫像 書曰真卿奉命來此事期未竟止緣忠勤無有旋意然中心恨恨始終不改游於波濤宜得斯報千百年間察真卿心者見此一事知我是行亦足達于時命耳又曰人心無路見世事只天知下有題曰觀此筆跡不顯歲月以事實考之蓋公使李希烈時也希烈以建中元年陷汝洲盧杞建議遣公奉使至正元宋諱貞元年八月丙戌公不幸遇害因蹟賊庭者踰二年刃加于頸而色不變度無還期誓不易節蓋書此以自表云靖康元年七月壬申朝散郎秘閣修撰知同州軍事唐重書 又有忠義堂帖宋人所刻此

帖名為奉命帖又有移蔡一帖曰貞元元年正月五日真卿自汝移蔡天也天之昭明其可誣乎有唐之德則不朽耳十九日書葉少蘊避暑錄話曰顏魯公真跡宣和間存者猶有數十本其最著與郭英又論坐位書在永興安師文家祭姪季明文病妻乞鹿脯帖在李觀察士衡家乞米帖在天章閣待制王質家寒食帖在錢穆甫家其餘與蔡明遠帖盧八倉曹帖送劉太真序等當劉太冲不知在誰氏皆有石本坐位帖安氏初析居分為二人多見其前段師文後乃併得之相繼皆入內府世間無復遺矣孫承澤曰送劉太冲序墨蹟舊在中書趙士禎家後歸之關中南宗伯宗伯沒其邑中舉人東蔭

商得之後復歸之南氏余從東君借臨月餘今國學所摹印即趙氏本也視墨蹟文字及書法俱小異豈傳世不止一本乎今忠義堂所刻已上諸帖皆有之又送辛晃序清遠道士同沈恭子遊虎邱寺詩末題大曆五年十二月又有開元二年二月顏元孫告身一通乾元元年四月顏昭甫告身一通寶應元年七月顏惟通贈秘書少監告身一通殷氏贈蘭陵夫人告身一通大曆十二年八月顏真卿刑部尚書告身一通建中元年八月顏真卿太子太保告身一通後有宋至和二年蔡襄跋嘉定乙亥留元剛刻石 金石文字記 秦郡庠墨洞石經十二

在今西安府儒學聖殿東明倫堂之後東西長廊樹立其下故稱墨洞開成二年立于國學 宋元祐二年移立于此舊唐書文宗紀開成二年宰相判國子祭酒鄭覃進石壁九經一百六十卷時上好文覃以經義啓導稍接文學之士遂奏置五經博士依漢蔡邕刊碑列于大學朔立石壁九經諸儒校正訛謬上又令翰林勒字官唐元度復校字體石末有元度等表文一通

周易十卷九石 二萬四千四百三十七字

尚書十三卷十石 二萬七千一百三十四字

毛詩二十卷十六石 四萬八百四十八字

周禮十卷十七石 四萬九千五百一十六字



儀禮十七卷二十石 五萬七千一百一十一字

禮記二十卷卅三石 九萬八千九百九十四字

春秋左傳三十卷卅七石 一十九萬八千九百四十五字

公羊傳十卷十六石 四萬四千七百四十八字

穀梁傳十二卷十六石 四萬二千八十九字

孝經一卷一石 二千一百一十三字

論語十卷六石 一萬六千五百九字

爾雅三卷四石 一萬七百九十一字

五經文字九經字樣四卷十石

九經并孝經論語爾雅字樣等都計六十五萬二千五百一十二字

大唐開成二年丁巳歲月次于元日維丁亥

書石學生前四門館明經臣艾居晦

書石學生前四門館明經臣陳玠

書石學生前文學館明經臣□□□□

書石官將仕郎守潤州句容縣尉臣段絳

校勘兼看書上石官將仕郎守秘書省正字臣栢曷

校勘兼看書上石官將仕郎守四門助教臣陳莊士

覆定字體官翰林待詔朝議郎權知沔王友上柱

國賜緋魚袋臣唐元度

校勘官兼專知都勘定經書檢校刊勒上石朝議

郎守國子毛詩博士上柱國臣章師道

朝散大夫守國子司業騎都尉賜緋魚袋臣楊敬之  
都檢校官銀青光祿大夫□□□□□□□□□□□□  
國子祭酒同中書門下平章事太清宮使監修國  
史上柱國滎陽郡開國公食邑二千戶臣覃

京兆府府學新移石經記

畧

汲郡龍圖呂公領漕

陝右之日持適承乏雍學一日謁公公喟然謂持  
曰京兆闕闕間有唐國子監存焉其間石經乃  
開成中鐫刻唐史載文宗時太學勒石經而鄭覃  
與周墀等校定九經文字上石及覃以宰相兼祭  
酒于是進石壁九經一百六十卷舊在務本坊自  
天祐中韓建築新城石經盡委于野至朱梁時劉

鄴守長安有幕吏尹玉羽者白鄴請輦入城鄴方  
備岐軍之侵軼謂此非急務玉羽給之曰一旦賊  
兵臨城碎爲矢石亦足助敵爲虐鄴然之乃遷置  
于此卽唐尙書省之西隅也地雜民居其處窪下  
隨立輒仆歲久折缺余欲徙置于府學之北墉遂  
視圖命役具器用築浮虛凡石刻之偃者仆者悉  
輦置于其地洗剔塵土補錮殘缺分爲東西次比  
而陳列焉明皇注孝經及建學碑則立之于中央  
顏褚歐陽徐柳之書下逮偏傍字源之類則分布  
于庭之左右先是有興平僧誕妄惑衆大尹劉公  
希遁没入其貲有請于朝以修慈恩浮圖者公建

言興建學校為急朝廷以五百千畀之不費于公  
不役于民經始于元祐二年初秋盡孟冬而落成  
門序旁啓雙亭中峙廊廡回環不崇不庠誠故都  
之壯觀翰墨之淵藪也如蔡中郎石經四十六碑  
范蔚宗纔見其十有二今皆磨滅不可攷矣然後  
知金石之固不得其人以護持之亦難必可久此  
呂公所以為有功于聖人之經而不可不書也元  
祐五年歲次庚午九月黎持記 河南安宜之書  
予以為尹玉羽之功在呂公之上諸石殘缺多  
明崇禎間長安費鑄另書九經補缺字樣別刻于  
石字不佳與唐石不類予所裝裱石經手自補綴

唐石有半字點畫可見者悉存之空缺處不得已  
用費字謄補玉羽小吏有功石經 清陝撫賈漢

復曲沃于康熙三年補刻孟子于石

孟子七卷十石 三萬六千五百六字

周宣王石鼓韓昌黎請自鳳翔移置長安國學而  
不可得元人乃不遠數千里輦置燕都石經自唐  
開成歷宋至明迄今千餘年而孟子一書補之者  
乃出于漢復之手不能不作繞朝之嘆然字與刻  
手皆劣不足以媲美唐石

顧寧人金石文字記曰宰相鄭覃以六經誤謬  
已多博士相沿難改正請召宿儒奧學詳校正定

準後漢故事勒石太學從之乃石經立又乖師法後數十年名儒皆不窺之以為蕪累甚矣舊史之評如此愚初讀而疑之又見新書無貶詞以為石壁九經雖不逮古人亦何遽不賢于寺碑冢碣及得其本而詳校之乃知經中之繆戾非一而劉昫之言不誣也畧識于左

案顧氏所駁石經之失大半出於後人補刻而未加詳覆

周易

君子以哀多益寡哀誤作衰 悔吝者言乎其小疵也言誤作存 其孰能與于此哉脫于字 周易繫辭下第八脫下字 易窮則變變則通通則久是以自天祐之吉無不利下多一也字 力小而任重誤作少 傷

于外者必反其家其誤作于 決必有所遇脫所字 蠱則飭也飭誤作飾 豐多故親寡旅也故下多一也字 姤遇也姤誤作邁

其與今文不同而兩通者 終來有他吉他作它 剛健篤實輝光輝作輝 君子以治厯明時厯作歷 可與佑神矣佑作祐 其受命也如嚮嚮作響 兼三才而兩三才之道也才皆作材

其一字而前後不同者 包蒙包荒包承包羞繫于包 桑繫辭下同包皆作苞包包有魚包无魚以杞包包瓜包皆作包

問以辨之由辨之不早辨也其辨明也明辨哲也辨吉凶者存乎辭困德之辨也井以辨義辨是與非皆作

辯君子以類族辨物剝牀以辨君子以慎辨物居方物小而辨于物皆作辨其旁注者至靜而德方德下添一也字 賁亨小利有攸往利下添一貞字

其先誤而後改者 畧例筌誤作荃 愈誤作喻 二无誤作無皆卽其誤改之

其標題周易繫辭上第七周易繫辭第八周易說卦第九皆八分書而周易序卦第十周易雜卦第十一皆正書雖依古註本附于第九之內以正書為別終似未安

尚書

乃祖乃父丕乃告我高后曰作丕刑于朕孫乃父誤作先父孫上多一子字 臣下罔攸稟令令誤作命 若

藥弗瞑眩藥誤作樂 王乃徇師而誓徇誤作循 乃

汝世讐世誤作誓 太保乃以庶殷攻位于洛納攻誤作公 用端命于上帝于誤作予

其與今文不同而兩通者 敢對揚天子之休命無之字

其旁註者 予有亂臣十人臣字旁註 惟婦言是用是字旁注 釋子箕囚封比于墓式商容閭于下容下各

添一之字

詩

小戎序國人則矜其車甲甲誤作田 舒憂受兮憂誤作憂 子尾脩脩誤作脩 戎車旣飭飭誤作飾

以祈黃者祈誤作祁 涼曰不可涼誤作諒 無此疆彼界誤作介 侯疆侯以疆誤作疆

其與今文不同而兩通者 雖雖鳴雁雖作雍 之死矢靡他他作它 不知我者謂我士也驕作不我知二

章同 和鸞雖雖作雍 何人斯序故蘇公作是詩以絕之也以作而 維塵雖兮雖作雍 既匡既敕敕

作勅 其政不復政從鄭箋作正 尚不愧于屋漏愧作媿 于彼西雝肅雝和鳴有來雝雝雝皆作雍 屢

豐年屢作婁 其先誤而後改者 抱衾與裯裯誤作稠 不瑕有害瑕誤作遐 鱸鱸發發發誤作撥 嚶杏背增嚶誤作蹲

如彼遡風遡誤作愬 駟駟牡馬牡皆誤作牧皆即其誤改之 云何其盱脫其字添

周禮

女史八人史誤作使 太宰三曰郊甸之賦郊誤作邦

內饗豕盲視而交曉豕誤作施 典臬掌布總縷紵

之麻草之物總誤作絲 牛人軍事共其犒牛犒誤作

犒 司市市司帥賈師而從賈誤作胥 肆長掌其戒

令令誤作禁 鞮鞻氏府一人一誤作八 鬯人滌門

用瓢齋用誤作明 司几筵設莞筵紛純筵誤作席

大司樂大磬磬誤作磬 王大食三侑侑誤作宥 大

師令奏鼓陳鼓誤作磬 大祝四曰禋禋誤作榮 司

常家各象其號象誤作相 凡以神仕者仕誤作士

小子史二人二誤作一 大司馬旗居卒間居誤作車

考工記蚡胡之笥笥誤作筓 矢人前弱則俛俛誤

作勉

其與今文不同而兩通者醫師死瘍者死上多一有字

野廬氏有相翔者誅之誅上多一則字 邦之大師

大上多一有字 庭氏以救日之弓與救月之矢射之

射上多一夜字

儀禮

士冠禮捷栖與捷誤作建 射禮司射適堂西袒決袒

誤作祖 福髮橫而奉之奉誤作拳 大夫與士射袒

纁襦纁誤作薰 燕禮右祭脯醢脯誤作醢 大射儀

賓升成拜拜誤作敗 坐授瑟乃降授誤作受 聘禮

賓既將公事復見訝以其摯訝誤作之 公食大夫禮

陳鼎于碑南南面西上脫一南字 覲禮天子賜舍曰

伯父脫曰字 士喪禮祭服不倒倒誤作到 少牢饋

食禮如筮日之儀儀誤作禮 主婦被錫衣侈袂侈誤

作移下同 祝延尸延誤作筮 有司徹二手執挑七

枋挑誤作桃 玉婦洗爵于房中脫爵字 主婦北面

答拜受爵尸降筮受主婦爵以降誤作受尸爵 主人

降洗爵爵誤作解下主人實爵並同 主人拜受爵尸

拜送脫爵字

其與今文不同而兩通者 鄉射禮適左个中亦如之  
亦作皆 燕禮小臣又請媵爵者二大夫媵爵如初大  
夫下更有大夫二字

禮記

御剛定月令在曲禮之前 月令人乃遷徙徒誤作徒  
其器闕以奄奄誤作掩 檀弓上周公蓋祔祔誤作

附 王制示弗故生也示誤作亦 禮器饗帝于郊而

風雨節寒暑時脫節字 學記燕辟廢其學辟誤作譬

喪大記男子出寢門外脫外字 子大夫公子衆士

食粥脫衆士二字 哀公問如此則國家順矣脫則字

坊記民猶薄于孝而厚于慈猶下多一有字 中庸

待其人而後行而誤作然 君子之所不可及者脫之

字 緇衣有國家者章義癯惡脫家字 儒行慎靜而

尚寬脫而字 大學人之其所親愛而辟焉五辟字皆

誤作譬 若有一个臣个誤作介

其與今文不同而兩通者 檀弓上有亾惡乎齊亡作

無 歲壹漆之壹作一 樂記非聽其鏗鏘而已也鏘作

鎗 雜記上客立于門西于作於 雜記下泄柳之母

死泄作世 喪大記命婦汎拜衆賓於堂上於作于

主人先俟于門外于作於 中庸可一言而盡也一作

壹 問喪祭之宗廟以鬼享之享作饗 大學堯舜帥

天下以仁二帥字皆作率 昏義祖廟既毀教于宗室

禮記



于作於 射義是以諸侯君臣以作故  
其先誤而後改者 學記教人不盡其材材誤作才  
故人不耐無樂耐誤作能皆即其誤改之

春秋左傳

隱元年且告之悔且誤作具 五年僖伯稱疾不從疾  
誤作侯 十年伐戴戴誤作載 桓二年故封大叔於  
曲沃故誤作政 六年楚之羸羸誤作羸 以類命為  
象類誤作德 閔二年從日撫軍軍誤作國 僖三年  
公子友如齊涖盟涖誤作泣 四年歸胙于公脫胙字  
妃置諸宮六日宮誤作公 公殺其傅杜原欸傅誤  
作傳 七年弗可改也已改誤作故 十四年公怒止

之止誤作上 十五年輅秦伯輅誤作輅 使郤乞告

瑕呂飴甥且召之且誤作國 二十五年昏而傅焉傳

誤作傳 二十七年責無禮也責誤作青 郤穀可穀

誤作穀 三十一年晉新得諸侯新誤作親 東傅于

濟傅誤作傳 三十三年入險而脫入誤作人 為從

者之淹淹誤作流 文元年王使毛伯衛來錫公命錫

誤作賜 享江芊芊誤作芊 二年廢六關關誤作闕

七年寘文公子焉焉誤作曰 十二年大子以夫鐘

與成邾來奔邾誤作封 宣二年晉趙盾弑其君夷皋

弑誤作殺 三年晉侯伐鄭及鄆鄆誤作延 商紂暴

虐紂誤作討 四年秋公如齊秋誤作利 六年離卦

誤畫作同人 八年殺諸絳市絳誤作終 十二年晉師在敖鄙之間師誤作帥 十五年吾獲狄土土誤作士 十七年盟于卷楚卷誤作巷 郤子其或者欲已亂于齊乎乎誤作平 十八年凡自虐其君曰弑虐上多一內字 成二年及齊師戰于新築師誤作侯 且辟左右且誤作旦 七年尋蟲牢之盟蟲誤作蠱 十七年楚公子橐師襲舒庸橐誤作橐 襄十年子蟜誤作矯 今伐其師今誤作令 十四年士鞅反誤作及 十七年苟過華臣之門必騁騁誤作聘 十九年而視不可舍舍誤作舍 所不嗣事于齊者事誤作是 天子令德天誤作夫 二十一年欒盈過于周過上多奔楚二字 二十三年邾畀我來奔畀誤作卑 二十五年先夫當之矣夫誤作天 共堙木刊堙誤作煙 賦車兵徒卒甲楯之類卒誤作兵 二十七年父子死余矣余誤作餘 免餘復攻甯氏餘誤作余 二十八年重丘之盟未可忘也忘誤作志 使析歸父告晏平仲晏誤作宴 文子使召之召誤作君 慶氏之馬善驚馬誤作焉 武王有亂臣十人脫臣字 三十年蔡景侯爲太子般娶于楚娶誤作聚 單公子愆期期誤作旗 駟帶追之駟誤作四 昭元年今武猶是心也今誤作令 二年齊使上大夫送之送誤作逆 三年少姜有寵而死姜誤作齊 知而復從復誤作弗 四年

恃險與馬馬誤作焉 五年娶于子尾氏娶誤作聚

君若驩焉好逆使臣若誤作苦 九年無圍猶可圍誤

作宥 十三年隱太子之子廬歸于蔡廬誤作盧 十

四年楚子使然丹簡上國之兵於宗丘宗誤作宋 二

十年余不忍其詢詢誤作狗 取人于萑苻之澤苻誤

作符 二十一年心是以感感實生疾感誤作咸 二

十二年士平出奔楚士誤作氏 邊印為大司徒印誤

作印 二十五年季公烏生申申誤作甲 二十七年入

于堀室堀誤作堀 定元年榮駕鵝駕誤作駕 三年

及邾子盟于拔拔誤作技 八年子姑使溷代子代誤作

伐 十年駟赤謂侯犯曰赤誤作亦 哀四年盜殺蔡

侯申殺誤作弑 蔡昭侯將如吳蔡誤作蔡 十六年

與晉人謀襲鄭晉誤作為 二十三年有不腆先人之

產馬馬誤作焉 二十六年四方其訓之訓誤作順

其與今文不同而兩通者 宣二年以視諸朝視作示

哀十六年此事竟則為卿事下有也字

其續添者 昭二十二年辛丑伐京毀其西南下添子

朝奔郊四字

春秋公羊傳

隱公元年何以名字也字上多一不字 二年婦人謂

嫁曰歸嫁誤作稼 三年曷為或言崩或言薨脫上一或字

生母相見死毋相哭毋字並誤作母死毋誤作母死

六年吾與鄭人末有成也未誤作未下同 十年宋人蔡人衛人伐戴戴誤作載 桓二年曰有有則此何以書脫一有字 隱賢而桓賊也賊誤作賤 莊十九年此其言遂何脫其字 二十五年求乎陰之道也陰誤作隱 三十二年狄伐邢邢誤作刑 僖四年南夷與北狄交誤作北夷 六年此其言圍何圍下多一者字 二十六年乞師者何脫師字 三十年歸惡乎元喧也乎誤作于 三十三年百里子與蹇叔子百誤作伯文四年其謂之逆婦姜于齊何何誤作河 宣十五年然後歸爾爾誤作耳 成十五年成公幼幼誤作憂 臧宣叔者相也叔誤作公 襄十四年季孫宿會晉士句宋華閱衛孫林父鄭公孫蠆莒人邾婁人于戚邾婁人脫人字 十七年春王二月二誤作三 十九年爲其驕蹇爲誤作或 二十九年許人子者必使子也人下脫子字 昭九年其言陳火何脫陳字 定元年立煬宮宮誤作公 四年夷狄也而憂中國而誤作其 哀四年盜殺蔡侯申殺誤作弑 六年齊國夏及高張來奔高上多一齊字 十四年顏淵死子曰子上多一孔字

其與今文不同而兩通者 隱四年隱公曰否作隱曰吾否 桓六年簡車徒也徒作馬 淫乎蔡乎作于 十一年祭仲者何鄭相也相上有之字 文六年何以

謂之天無是月非常月也是月下更有是月二字 宣  
六年此非弑君而何而作如 十年未絕於我也於作  
于 十二年是以君子篤于禮而薄于利下於作于 成  
二年得一貶焉爾一作壹 襄十二年春王正月正作  
三 二十九年爾殺吾君殺作弑 三十一年于是負  
孝公之周愬天子愬作訴 十四年有麇而角者麇作  
麇

其先誤而後改者 桓二年此其目言之何目誤作月  
閔元年盍弑之矣使弑子般弑並誤作殺 僖十三  
年葬陳宣公宣誤作桓 成二年及齊侯戰于鞏侯誤作  
師 昭二十五年慶子免君于大難矣脫矣字皆即其  
誤改之

春秋穀梁傳

隱元年父者何傳也傳誤作傳 四年弑而代之也代  
誤作伐 九年所俠也俠誤作挾 莊七年則是雨說  
也雨誤作雨下同 僖五年天子世子世天下也誤作  
士子 二十三年春二十有四戰脫有字 二十八年  
晉侯齊師宋師秦師誤作齊侯 文二年內大夫可以  
會外諸侯脫外字 三年王子虎卒誤作王子 宣八  
年以譏乎宣也譏誤作饑 襄元年晉侯使荀營來聘  
營誤作嬰二年三年同 三年諸侯始失正矣正誤作  
王 六年立異姓以蒞祭祀立上多一非字 哀元年

此該之變而道之也該誤作郊 六年入者內弗受也  
弗誤作不下同

其與今文不同而兩通者 僖十七年桓公嘗有存亡  
繼絕之功脫公字 文六年處父主境上事事上多一  
之字 成五年率羣臣而哭之前作率後作帥  
其先誤而後改者甚多不具載

論語

賜也爾愛其羊爾誤作女 不知其仁仁誤作人 子  
使漆雕開仕雕誤作彫 再斯可矣斯誤作思 三人  
行三上多一我字 必有我師焉有誤作得 冉有子  
貢侃侃如也有誤作子 告夫三子三上多一二字

可與言而不與之言脫之字 無求生以害仁仁誤作  
人 吾猶及史之闕文也脫之字 稱諸異邦稱誤作  
謂 何德之衰衰下多一也字

其與今文不同而兩通者 女得人焉爾乎爾作耳  
人潔已以進潔作絜  
其先脫而後添註者 陽貨篇子曰巧言令色鮮矣仁

爾雅

替戔底廢誤作底底 翻轟也翻誤作翩 皇華也誤  
作華皇 赫兮喧兮喧誤作烜 是刈是穫穫誤作穫  
木謂之虞木誤作木 何鼓謂之牽牛何誤作河 澤  
鳥瓊瓊誤作蒼 葶麻母葶誤作葶 獲橐舍獲誤作

攫 祝州木祝誤作祝 魚尾謂之丙尾上添之字

燕白胆鳥鳥誤作鳥 楊鳥白鷺楊鳥誤作鷺 鳶鳥醜

鳥誤作鳥 鳥鵲醜鳥誤作鳥 麀大麀誤作大麀

凡經中二十字皆作卅三十字皆作卅按古詩之文多

是四言如于三十里三十維物皆四言也則當為三十

字史記秦始皇刻石如卅有六年維卅九年卅有七年

則當為卅字卅字今改經文而為卅卅字非矣

凡經中虎字皆缺末筆作虍虍號號饗澎簾禡字皆同

避太祖諱 淵字皆缺筆作滹媼亦作媼避高祖諱

世字皆缺筆作世泄作洩繼作綫棄作弃勩作勩葉作

葉涼揀鞞諫塚倅皆改從云 民字皆缺筆作尸氓

作眈岷作岷昏緡瘖磻愍愍蝨皆改從氏避太宗諱

亨字皆作亨避肅宗諱 豫字皆缺筆作豫避代宗諱

适字皆缺筆作适避德宗諱 誦字皆缺筆作誦避

順宗諱 純字皆缺筆作純避憲宗諱 恒字皆缺筆

作恒避穆宗諱 湛字皆缺筆作湛甚作甚樵作樵避

敬宗諱 乃著高宗諱治中宗諱顯睿宗諱旦元宗諱

隆基文宗諱涵皆不缺筆者禮天子事七廟自肅至敬

七宗而高祖太宗創業之君不祧者也元宗以上則祧

廟也故不諱 冊府元龜寶曆元年正月太常寺禮院上

可文宗則今上也古者卒哭乃諱故生不諱 左傳文

公宣公卷字更濫惡而成城字皆缺末筆穀梁襄昭定

哀四公卷儀禮士昏禮皆然皆為朱梁所補刻考之宋

劉從父黎持二記但言韓建劉鄩移石而不言補刻

隆三年劉從父脩文宣王廟記言天祐甲子太尉許國

公為居守移太學并石經于此甲子昭宗遷雒之年許

國公者韓建也元祐五年黎持新移石經記則云天祐

中韓建築新城而石經委弃于野朱梁時劉鄩守長安

從幕吏尹玉羽之請輦入城中置于此地唐尚書省之

西隅也今龍圖呂公領漕陝右命徙置府學之北墉而

建亭焉二說不同朱彝尊曰尹玉羽者京兆長安人

以孝行聞劉鄩辟為保大軍節度雅官歷雍汴滑堯從

事仕後唐至光祿少卿晉高祖召之辭以老退歸關中嘗

著自然經五卷武庫集五十卷其事散見于冊府元龜然

成字缺筆其為梁諱無疑昔人固未嘗徧讀而博考也

五經文字三卷

凡一百六十部三千二百三十五字大厯十一年國子

司業張參以說文字林兼采漢石經著為定體按劉禹

錫國學新修五經壁記曰大厯中名儒張參為國子司

業始詳定五經書于論堂東西廂之壁辨齊魯之音取

其宜考古今之文取其正由是諸生之師心曲學偏聽

臆說咸束而歸于大同積六十載崩剝汗巖泯然不鮮

今天子尙文章尊典籍國學上言遽賜千萬時祭酒皞

博士公肅韋公肅遂以羨贏再新壁書懲前土塗不克以

壽乃折堅木負墉而比之其製如版牘而高廣其平如粉澤而潔滑背施陰關使衆如一附離之際無迹而尋堂皇靚深兩屋相照申命國子能通法書者分章揆日懸其業而繕寫焉此文當作于太和年間自土塗而木版自木版而石壁凡三易矣乃金石刻其末曰乾符三



年孫毛詩博士自牧以家本重校勘定

當云毛詩博士孫自牧于文乃順

七月十八日書刻字人魚宗會其字別體與朱梁所刻

相類而本文不然當是開成中所刻其中有磨改數字

者意自牧所為也

金石文字記

新加九經字樣一卷

凡七十六部四百二十七字國子監奏覆定石經字體

官翰林待詔唐元度狀准太和七年十二月五日勅覆

定九經字體者今所詳覆多依司業張參五經文字為

准其舊字樣歲月將久點畫參差傳寫相承漸致乖誤

今並依書字叅詳改正諸經之中別有疑闕舊字樣未

載者古今體異隸變不同如總據說文即古體驚俗若

依近代文字或傳寫乖誤今與校勘官同商較是非取

其適中纂錄為新加九經字樣一卷請附于五經字樣

之末奉勅宜依開成二年八月十二日中書門下牒

冊府元龜周太祖廣順三年六月尚書左丞兼判國子

監事田敏獻印板書五經文字五經字樣各二部一百

三十策奏曰臣等自長興三年校勘雕印九經書籍

經註繁多年代殊邈傳寫紕繆漸失根源臣守官膠庠

職司校定旁求援據土備銘鐫幸遇聖朝克終盛事播

文德于有截傳世教以無窮謹具陳進是此二書曾有

印板而自宋以來學者不言之何也

金石文字記

尊勝咒石幢

五

吏部南曹尊勝咒石幢

今在西安府學文廟櫺星門內與六部題名石幢對立左光允撰

序 天寶元年

崇仁寺尊勝咒石幢

今在西安府城十里西今名金勝寺張少悌書 天寶七載

今寺僧龕置經堂前知所愛護一字不損趙子函云深圓秀逸顧寧人謂以少悌之名存之

慈恩寺尊勝咒石幢

今在西安府城南寺內堂前

草堂寺尊勝咒石幢



今在鄠縣 楊萬歲書 乾符三年 經咒石幢秦中

在處有之不下二十餘種太宗昭陵前趙村內有石鼓寺鼓制如周宣王石鼓而稍大亦遍書尊勝經咒行筆甚佳剝蝕過半余搜揚陵碑獨畧乎此今思亦覺可惜寺僧築土臺置鼓其上古色甚可觀

成都府尊勝咒石幢

嘉靖間土中掘出 馬季武正書 太和四年 字特大

與前五石異在成都石犀寺



張有麟在亥老墨

卷中

三六

